

**[真人真事改編][校園][愛情]竟然  
因為IG  
live而帶來一段突如其來的緣份...**

作者: 愚人言志

Powered by [紙言](#)

# 序——

## 序章——

中學嘅生活，到底係甜蜜？苦澀？抑或係淡然無味？  
呢一段命中注定嘅緣份，令兩個人嘅人生開始交集  
將二人嘅紅線牽起  
開始譜寫出名為青春嘅樂章  
將二人嘅人生改寫  
一名女生告訴一位男生  
在我面前  
儘管卸下面具  
不要再被心中的枷鎖拘束  
就讓我把你心裏嘅枷鎖解開吧

---

這是一個真人真事嘅故事  
雖則可能沒有什麼特別打動人心嘅劇情  
但卻是最扣人心弦且容易引起各位中學生共鳴又純真嘅現代愛情故事

---

今次係小弟第一次寫故  
希望各位喜歡吧  
如果唔介意都可以follow一下小弟嘅IG：[@yinch409](#)  
我只係一個鍾意睇小說，然後不知天高地厚而嘗試創作嘅小書僮  
筆墨耕耘

# 第一章——「開學日」

## 第一章——「開學日」

一切都要由2021年第一日返學開始講起

「鈴...鈴...鈴...」呼.. 邊個喺度嘈鬼住人瞓覺，明明仲放緊暑假都要嘈...

咪住先！今日係九月一日...九月一...SHIT!!!

點解可以傻到咁架！

就連咁簡單嘅嘢都唔記得！媽啊，你點解要遺傳個咁冇記性嘅腦俾我吖！

母親大人喺廚房大叫「仔啊，再唔起身就遲到喇！」

「死啦！我唔記得左今日要返學吖！而家著校服落嚟。」

「死蠢！點解可以連返學咁大件事都可以唔記得架。」

「你仲好講！咪就係遺傳咗你同阿爸嘅基因。」

大家千祈唔好誤會，我哋唔係嗌緊交，只不過我哋全家平日都係咁樣溝通。

頭先喺廚房大叫嘅就係我屋企嘅母親大人

佢係一個全職嘅家庭主婦

朝早我返咗學，同埋阿爸返咗工佢就去買餸

買完有時間就會去隔離屋企同佢嘅雀友打麻雀

雖然我已經中五

但係每一日出門口前我同阿爸都有個指定動作，就係錫阿媽一啖。

可能有人會覺得好尷尬

但其實諗深一層都幾溫馨呀～

有時間就留意吓自己嘅屋企人

細心留意吓佢哋嘅變化，眼睛已經冇以前咁精神，而且開始有魚尾紋

可能係因為平日操勞吧。

但就係因為種種歲月嘅痕跡，令到我哋知道屋企人都已經邁入年老

而我阿爸就係一個公司高層，所以由細到大都可以叫做衣食無憂嘅。

講咗咁耐終於到我，我叫方辰軒，Lucas。

同我熟嘅人都會叫我阿軒。

我身為一個中五嘅學生，比香港一個稱為教育制度既無形監獄洗禮咗13年

而下半年終於要迎來人生第一個大Boss—— DSE

由細到大屋企人都同我哋講「喺香港一定要入大學」

久而久之就被灌輸左一種思維就係香港呢一個彈丸之地容唔下教育制度下嘅失敗品

所以每一個香港嘅學生，每一日都過住一啲膊頭充滿負擔，透不過氣嘅生活

可悲嘅係每一個人人都習慣咗呢一種籠中鳥嘅生活

當然畢業後就會發現其實中學都只不過係一個轉捩點  
社會先至係真正嘅高牆，而作為雞蛋亦都只能夠硬食  
呢啲都係後話

不然越講越多，返返嚟九月一先。

「死啦，遲到啦！」我以迅雷不及掩耳嘅速度着上校服揸起書包就打開房門  
連燈都唔熄就衝出走廊再跑去客廳

「早晨吖！母親大人。」

「早晨～快啲過嚟食早餐啦。」母親大人又話「今日記得帶遮啊！天文台話會落雨。」

「係啦！知道啦。」直接省略了咀嚼嘅過程...

用9秒9嘅時間去吞下母親大人精心調製嘅早餐...

「阿爸早晨，我出門口啦！」當我大叫完呢一句就拎起鎖匙跑出門口。  
每次當我趕住就嚟遲到返學嘅時候都總會跌入一個地獄——電梯嘅無限輪迴  
心急如焚之際，突然俾人好大力咁俾人拍咗一下背脊  
差少少就連頭先嘅早餐都嘔埋出嚟

「早晨嗰～死仔！」

「真心建議你下次拍細力啲，你十幾年嚟都係咁真係尾龍骨都就嚟俾你拍斷。」

呢一個係我由細玩到大嘅好兄弟——黃天翊  
亦都係唯一一個朋友可以令我喺佢面前卸下我嘅面具  
阿翊係學校嘅風頭躉  
現代嘅再世潘安  
俊俏嘅面孔，鋼鐵般嘅身材，清爽嘅短髮  
簡直就係男性嘅完美典範  
除咗成績唔係特別出眾之外  
無論運動抑或藝術方面都堪稱天才  
作為一個毒L企喺佢隔離簡直係相形見絀  
有為數不少嘅師姐師妹擲果盈車，嘗試去獲得男神嘅歡心

相信大家以為佢係一個風流倜儻嘅不羈少年  
但佢向卻是一個「A0」  
因為佢一直都本着一個信念  
「鍾意一個人唔使負責任，但當你同左一個人一齊就有着極大嘅責任。」  
佢又話愛係要包容佢嘅全部，而佢暫時未遇到一個人值得佢咁樣做  
唉...毒L果然唔會明一個男神嘅思維  
明明成日都話想拍拖但係有咁多選擇又視而不見

言歸正傳！

我同呢一位兄弟都係喺一間Band1尾嘅學校裏面服刑  
作為學校嘅夾心階層

雖然成績唔算太差，但絕對稱唔上最頂流最乖巧嘅學生  
亦都唔係老師嘅心頭好，又或者所謂嘅「模範學生」  
但係學校就係一個小型嘅社會  
「你的樣子如何你的日子也必如何」  
正正因為阿翊英俊瀟灑，風流倜儻嘅魔鬼面孔以及身材  
所以擁有嘅學校呼風喚雨嘅能力  
就正如一個嘅社會頂層嘅成功人士  
而我作為佢嘅好兄弟亦成功地俾佢連帶效應地成為「阿翊嘅好兄弟」  
呢一件事並不風光，甚至招惹大量麻煩。

佢所有嘅追求者都好似當左我係一個儲物櫃，又或者一個郵筒  
「阿軒！可唔可以幫我俾啲蛋糕同埋封信天翊BB吖！」  
每次當我想拒絕嘅時候，佢哋就會話唔該晒你  
然後跑走...  
就連拒絕嘅時間都有...  
唉...地位是如此卑微。

話雖如此～  
佢絕對係一個好兄弟  
好兄弟就係當你需要佢嘅時候，佢會挺身而出幫你  
唔開心嘅時候，會開解你  
一齊癲！一齊喪！  
「贏嘅話，我陪你君臨天下  
輸嘅話，我同你東山再起」  
雖然佢成日都掛住呢兩句咁肉麻嘅說話喺嘴邊  
但係真心我都幾慶幸細個識到呢個好兄弟

「點啊！今年仲打唔打算帶住你嗰個保護自己嘅面具？」  
佢所指嘅「面具」  
正是我嘅同學、老師甚至乎有時屋企人面前一個「冷靜、寡言」嘅形象  
好多人都唔明點解要咁做  
只係出自我嘅自我保護意識  
並非個人意願  
「你知道呢件事唔到我揀㗎啦～如果可以放低嘅話我都想」  
「可能今年會遇到一個人可以幫到你呢～」  
「承你貴言！」  
「總之記住喺我面前做返自己！」  
而家嘅我諗返起當時阿翊講嘅「遇到一個人」  
就對佢嘅「預言」感覺到如此嘅神奇  
「入啦！天翊BB～」  
佢回應道「嘔心！」  
「今年中五一齊加油啦～」

佢伸出拳頭

而我亦都用我嘅拳頭作為回應  
希望今年中五能夠平平安安，無風無浪地渡過吧！

## 第二章——「時候不早」

第二章——「時候不早」

「軒爺，你估今年我哋班會唔會有靚女啊嚟？」

「有又點？冇又點？對我呢啲毒L來講根本冇分別...」

「我同你賭！根據靚女一定係人哋班嘅定律來講，我買今年冇！」

其實冇靚女對我嚟講根本冇任何影響

我從來都唔相信愛神邱比特，又或者月老會睇得上我

「咁你都揀咗啦～咁我買有囉～」

雖然話就話對我冇影響，但係其實內心都仲有一絲期望，希望會有！

確實如果有靚女喺班入面

返學嘅意欲都會比較大

阿翊突然出聲講：「以我哋而家嘅步速！一定遲到！」

「遲到對你嚟講雞毛蒜皮啦～」我扮晒嘢咁串佢

「咁不如去食咗早餐先啦！」

我徹底地對呢條友感到無言又無奈。

所以我就一於少理

望住隻錶，仲有25分鐘就會打起遲到嘅鐘聲，

因此，我開始咗同時間競賽，

時間呢一樣嘢係人類嘅不可控力

亦都係人類最大嘅敵人。

感覺上世界嘅一切都係由時間控制，

所有嘅遺憾都係由時間造成。

以人類現今嘅科技唔能夠做到回到過去或穿越未來。

時間一直都流失緊，就似一個沙漏，

又好似一枝箭咁，射咗出去之後你冇辦法控制佢嘅方向。

咁所以我而家呢一刻就係同緊人類最大嘅敵人搏鬥。

電光火石之間，我亦都化身一粒子彈，

迅速地奔向小巴士，

而身為運動健將嘅阿翊亦都不急不慢地追上我，

我眼尾見到佢俾咗個眼神我，

喺呢一瞬間，我明白到男人之間嘅對決要開始了！

我同佢就好似喺馬場嘅馬一樣，專注地奔向終點，

結果亦都好明顯地我輸比佢九條街.....

「傻仔，練多幾年先再嚟挑戰我！」

我連條氣都未抖順佢已經可以游刃有餘地講到一句完整說話。

我輸到一敗塗地.....

雖然係預料中嘅結果，但係都有啲唔甘心。

當我仍在休息之際，小巴終於到達。

而我同阿翊不慌不忙地上車後，

就坐咗喺二人座位度，  
我同佢每次搭車都有一條不明文規定，  
就係兩個人一定會戴起耳機聽歌並且唔會打擾對方直至到達目的地。  
喺呢個時候Spotify播起MC張天賦嘅『時候不早』  
哈.....真諷刺.....

與此同時，一條名為塞車嘅車龍影響咗我同時間嘅競賽，  
而且當我哋到達目的地嘅時候，  
我哋就聽到不幸嘅鐘聲響起，  
冇錯.....我哋遲到了  
第一日返學就遲到了.....  
正所謂「一年之計在於春，一日之計在於晨」  
我哋為新嘅一年開咗一個糟糕嘅序章.....

我哋一踏入校門，  
就見到身被羊皮嘅一堆大灰狼以及帶着皇冠嘅狼王，  
亦都即係每個人中學都曾經討厭嘅Prefect，  
以及令人聞風喪膽嘅訓導老師——「獅子王」  
獅子王呢一個名稱嘅由來，首先係因為佢姓王，  
其二係因為佢嘅獅吼功，  
最後就係因為佢掌管住幾乎學生最高權力——「Prefect」  
唉.....

返學第一日就咁黑仔，希望今年真係可以平平安安渡過。  
「同學！你哋遲到！快啲寫低你哋嘅姓名，班別，學號！」獅子王叫到。  
我就死氣沉沉咁講：「5C班！16號方辰軒！」  
而喺我講完呢一瞬間，  
我瞬間感受到咁叫差別待遇。  
其中一個Prefect說道：「5C班21號黃天翊啊嘛～學校有邊個唔識你～」  
「大家咁話啦！Head prefect而且又係校花～符曉晴Métis 同學。」阿翊諷刺地回應道。  
佢哋兩個係由中一就鬥到中五嘅同學，  
亦都係一對學校極度出名嘅歡喜冤家。

上至天文，下至地理  
總之乜都鬥一餐。  
如果阿翊係潘安嘅話，咁Metis絕對可以被稱為係西施都不為過！  
而係呢五年裏面，  
如我剛才所言，有大量女性為阿翊擲果盈車，  
而同樣地亦有大量男性拜倒於Métis的石榴裙下。  
但同樣地Métis亦都同阿翊一樣，冇拍過拖  
原因就不得而知，始終我同佢並唔熟。  
對佢嘅了解只係學校嘅女神。  
「方辰軒同學以及黃天翊同學快啲返去自己班房，同埋記得今日放學要去留堂！」獅子王叫道。  
「係.....知道。」我同阿翊死死地氣地回應道。



### 第三章——「美麗之最」

第三章——「美麗之最」

正當我哋行緊返課室之際，

「軒爺！不如你自己返課室先？我要去廁所。」阿翊突然講到。

「得啦！課室見！」

「你記住搵個二人空位一齊坐！」

「知道啦！你快啲去你嘅廁所。」

幸好我哋今年嘅課室係喺2樓，

唔使每一日朝早都行到身水身汗！

我哋今年係5C班，亦都即係中五咁多班裏面最中規中矩

唔會話太差，亦都唔會話太好

而且今年嘅班主任都係其中一位學校比較年輕嘅男老師——「姜Sir」

因為老師喺學校，簡直受盡愛戴，人見人愛以及親和力極高，

係學校其中一位風雲老師，

而佢則任教我地中文。

/

唔使3分鐘，已經返到課室門口，

我就有禮貌地敲敲門，

然後低聲下氣「對唔住遲咗少少！」

姜sir：「唔緊要，快啲搵個位坐低。」

瞬間我就見到班裏面角落頭有個二人空位，

我不加思索就直接去到角落頭坐低。

過咗唔夠一分鐘，又有人敲門。

我當下心想「阿翊今日咁有禮貌敲門嘅？！」

正當我以為入門口嘅係阿翊，

但係結果總係異想不到。

入嚟嘅竟然係一個美若天仙既美少女，

簡直擁有「沈魚落雁之容，閉月羞花之貌」

話佢似王昭君都不為過。

全班都目定口呆咁望住佢。

但係我諗深一層，

唔知點解總係對呢一個女仔冇乜印象，

始終係呢間學校生活左五年，如果同級嘅應該點都見過，

我哋班嘅男性生物，瞬間起哄！

「女神啊...」男性們異口同聲地說道。

「呢個女仔邊個嚟㗎？」女性們則議論紛紛

「咳...咳...大家俾少少時間呢位同學自我介紹下！」姜sir叫道。

「Hello！大家好！我叫陳楚柔！大家可以叫我阿柔或者楚柔！英文名係Natalie！大家可能對我有啲印象，因為其實我一直都喺呢間學校裏面，只不過因為之前身體狀況，所以唔能夠一直返學。所以大家可能對我好陌生，希望大家今年多多指教！」

「咁楚柔你搵個位坐低先。」

「好！」

當姜sir叫陳楚柔搵個位坐嘅時候有唔少男同學即刻起哄

「我隔離有位呀呀呀！」

「坐我隔離啊！」

「我唔介意為咗你調位㗎！」

全班嘅男同學都如狼似虎咁樣『邀請』陳楚柔成為鄰座。

如同我所講，

身為一個毒L，根本冇諗過佢會同我坐，亦都唔敢奢想

所以此時此刻嘅我，只係坐喺班房嘅角落觀看呢一場鬧劇。

過咗5秒左右，

佢就有所行動，

佢由老師枱慢慢行到去最後一行，

換言之，即係我個位嗰一行

我就喺度諗「前面冇位㗎啦嗰...」

然後諗諗吓，再望一望自己右手邊

呢一行最後一個空位，

亦都即係話佢行緊過嚟我隔離個位。

「唔好意思...我想問你隔離有冇人坐㗎？」

「冇...」

「咁你介唔介意我坐喺呢度？」

「唔...介意...」

「嚟緊之後多多指教！」

而呢一次，就係我同佢第一次嘅對話，

至今仍然歷歷在目，

兩條平行線開始不再平行，

注定進入對方嘅生活。

## 第四章——「心亂如麻」

第四章——「心亂如麻」

「咯咯...咯咯...咯咯...咯咯...」

突然，一堆突如其來的沉重腳步聲由遠至近咁傳入我耳朵。

直覺話俾我知，...係阿翊...

而果不其然，佢就入咗班房了。

「sorry呀遲咗少少！」

此時此刻嘅班房，亦都響徹如雷...

「天翊BB！」

「翊寶！坐喺我隔離啦！」

「黃天翊！我好想同佢瘋狂做功課吖！」

情況就同啱啱陳楚柔入班房嘅情況如出一轍，

阿翊亦都用佢嘅招牌笑容去回饋佢嘅裙下之臣。

「呀呀呀呀！」

「你見唔見到呀！佢對住我笑呀！」

「佢嘅笑容好陽光啊！」

「如陽光伴我！」

.....

使唔使咁誇張...

「唉...快啲搵個位坐低啦...」

姜sir亦都無言地回答道

而此時此刻嘅我即刻望出窗外，

試圖迴避阿翊嘅眼神...

結果亦都明顯地失敗了，

佢嘅目光由左至右掃射整個班房，

而當佢目光到我座位嘅時候，

我不期然咁樣用心虛嘅眼神望住佢，

而我亦都感受到佢嘅眼神充滿着無奈以及些許奸狡，

以我同佢咁多年嘅交情，

我就好似見到佢心裏面嘅狐狸正在奸笑，

佢一定心想「死仔！說好的同我坐...但見你隔離係女仔就算啦！」

我亦都還以佢一個無奈的眼神，

去傳達一個小小而無力嘅抗議.....

而經過一群女性嘅擾攘之後，

阿翊亦都選擇無視呢一班女性，

然而事不關己咁行去我附近嘅一個空位坐。

「Hello！」

突然，一把聲音傳入我耳朵，

然後我轉頭望向楚柔，  
「你好...」「我叫陳楚柔！可以叫我阿柔或者Natalie，你呢？」  
毒L嘅性格又出咗嚟...  
完全唔夠膽望住佢雙眼，  
「我係方辰軒，叫我辰軒！多多指教。」  
「哈哈！你同人講嘢唔望住人咁隻眼嘅，多多指教啦。」  
我感受到耳朵微微發熱，  
然後扮作若無其事咁望返黑板。  
今日全日都心神恍惚，  
但係當時對感情從來都唔敏感嘅我，  
完全唔知係咩原因，  
當然之後終於知道心神恍惚嘅原因。

\* \* \*

時間嚟到放學，  
由於我哋學校有規定，  
如果遲到放學就要留堂  
換言之，我同阿翊放學都係要去，  
但我突然諗到今日阿柔好似都遲到，  
唔知等陣會唔會見到佢呢？  
我又再次陷入心神恍惚嘅狀態，  
阿翊見到我咁嘅情況就問我  
「你搞咩呀？」  
「冇...諗緊今晚食咩啫...」  
佢見到我咁嘅樣，  
亦都大惑不解。

留堂班嘅我哋課室嘅下一層，  
所以其實我哋好快就會到，  
而當我落到樓梯轉角嘅時候，  
就見到阿柔神色緊張咁左顧右盼，  
我都不以為意咁樣行過去留堂室，  
去到門口嘅時候阿柔就問我

「辰軒吖，我可唔可以同你坐？因為我啲朋友話留堂班係學校嘅三不管地帶，所以有啲驚...」  
呢個時候阿翊聽到，  
亦都俾咗個眼色我然之後就同佢其他朋友一齊坐，  
而我就回答到  
「冇問題。」

學校嘅留堂室被稱為三不管地帶，  
原因亦無非因為學校嘅「不良學生」長駐喺呢度附近，  
所以基本上連老師都管唔到，  
所以可謂生人勿近。

我哋入到去就揀咗個角落頭坐低，  
然後拎我哋嘅筆記溫習，  
溫習嘅途中，  
我亦都發現雖然阿柔之前冇乜點返學，但係佢嘅成績絕對不下於我哋學校嘅精英學生，  
溫溫下佢突然問我  
「你選修啲咩㗎？」  
「中史西史，你呢？」  
「Oh my god!我同你一模一樣！你係咪抄我㗎！」  
「吓...」  
「欸.. 哈哈，講笑啫~」

我好無奈咁樣望住佢，  
佢笑到見牙唔見眼，  
而且佢嘅笑容好似有魔法咁，  
令到我嘅煩惱一掃而空，  
亦都係多得呢一個笑容，  
先至令到我可以解開心結。

## [公告]

小弟絕對唔會放棄呢個故！  
但而家考緊公開考試所以放低左支筆一陣  
放心！  
考完試之後回歸  
補償番幾篇畀大家  
抱歉  
謝包容

## 第五章——「心跳回憶」

第五章——「心跳回憶」

當我仍然呆滯地望住佢嘅笑容之際，  
佢雙手喺我面前掃咗兩掃，然後說道

「你有嘢咁嘛？」

我先突然回過神來，

「冇事，繼續溫習吧。」

隔左冇幾耐，

突然感受到有嘢掂到我個頭後方，

擰轉身一望，

發現原來係阿翊，

佢掉咗一張紙仔過嚟，

「做咩望住人咁望到入晒神～」

然而，我亦都回佢一個冷眼，

以表達我嘅無奈。

然而，我就再次專注喺面前嘅功課同埋筆記上，

面對着堆積如山嘅筆記，

浩瀚嘅書海，

感受到嘅，

只係比石頭壓着喘不過氣嘅感覺，

呢種感覺...

真係好難受...

我偶然間咁望向溫緊習嘅阿柔，

整齊嘅筆記，

色彩絢爛嘅便利貼，

佢大概都係一個完美主義者吧。

\*\*\*

鈴鈴鈴...

鈴鈴鈴...

聽到落堂嘅鐘聲，

我都不自覺地嘆一口氣，

咁我終於短暫地逃離呢一個強制教育營，

呼...終於可以休息一陣...

「呼！終於走得～」

阿翊好似一個漏氣嘅充氣公仔咁樣講，

而我起身之前亦都向左邊望一望，

阿柔慢慢咁將佢嘅功課同埋筆記放入書包。

「咁聽日見啦！辰軒～」

「聽日見。」

講完佢就慢慢一個人咁樣離開課室，

我亦都同阿翊一齊返屋企。

返屋企嘅途中，

我突然諗返起今日朝早嘅賭注，  
「翊，你應該記得你今朝早同我賭過，你覺得今年冇靚女㗎呵～」  
「冇冇冇，冇啲咁嘅事～」  
「願賭服輸！」  
「得啦！幾時走過你數？聽日請lunch...」  
「感謝大佬！」

行咗唔夠五步，  
佢又問返我轉頭  
「啱嘅鎖匙？」  
「鎖匙？」  
回答完，就冷笑左一聲。

時間回溯返去，頭先係留堂班嘅時候，  
我嘅一舉一動，而家諗返起都覺得好...  
好...  
好...奇怪...?  
眉頭一皺，  
望住個天慨嘆左一聲...  
只係太叻啫！

回望頭先留堂班嘅情況，  
心底裏有種奇怪嘅感覺...  
但係我打從心底唔鍾意呢種感覺。

喺我望天打卦之際，  
我同阿翊已經不知不覺咁去到屋企樓下，  
而係呢個時候亦都聽到一把女聲...  
「黃天翊！過嚟幫我擺住呢幾袋野！」  
「係...收到你...」  
呢一個能夠令到阿翊低聲下氣嘅女性，  
就係佢親家姐——「黃天藍Mika」  
而明顯地佢哋兩個真係親生姊妹，  
二人都遺傳咗父母完美嘅基因，  
如我之前所講，阿翊係再世潘安，  
而Mika就絕對稱得上再世王昭君。

中大讀緊中文系嘅佢集結美貌與智慧於一身，  
迷倒一眾男生嘅佢唔單止因為甜美嘅外貌，  
個人認為同佢嘅心胸廣闊有極大嘅關聯性...  
嗯...  
心胸非常廣闊...  
我見到佢之後就同佢打招呼  
「家姐！」  
「啲～軒仔～」  
我同阿翊都係一樣叫佢家姐，  
因為始終由細玩到大，



所以習慣咗了。

「啊！唔記得咗仲有嘢要買！細佬你跟住我幫手攞嘢！」

「係...收到你...」

突然之間，家姐就捉住阿翊向着超級市場嘅方向進發。

而阿翊亦無奈地一邊嘆氣去回應佢...

嗯...

呢兩姊妹真可愛～

雖然家姐偶爾會有少少傻氣，

但係係重要關頭，都係一個相當可靠嘅人！

當佢哋離開嘅時候，

我亦都轉身向屋企嘅方向進發，

再次戴上隔絕世界嘅儀器，

躍進我嘅一人之境。

入到，旁邊有一個應該素未謀面嘅女孩子，

身穿一間傳統女名校嘅校服，

而碰巧呢一間學校就正正處於我學校嘅對面街，

此時此刻嘅我亦都冇理會到呢一個女孩子，

當到達我屋企嘅樓層，我就行出，

但估唔到原來呢個女仔同我有咁深嘅淵源.....

## 第六章——「給十年後的我」

第六章——「十年後的我們」

「人生如戲，戲如人生」  
呢個世界所有嘢都意想不到，  
某啲經歷就好似每一晚八點檔嘅節目一樣，  
老土卻真實，  
荒謬成現實。  
正正係我體會緊嘅嘢...

「母親大人，呢位到底何方神聖...」  
我悄悄咁樣問母親大人。  
「你記唔記得你細個同天翊成日都落去樓下屋苑個公園度玩？」  
佢亦都細細聲地回應我。  
「呃...有少少印象吧...」  
經過一輪時空同記憶嘅錯亂之後，  
我就回答道。

\*\*\*

「你好呀！我叫做方辰軒～由今日起我哋就係朋友啦！」  
一個男孩子同緊一個素未謀面，  
甚至連名都唔知嘅女孩子交談道。  
女生經過一番遲疑，  
「你...好，唔該晒...」  
見到佢慢慢抬高頭，  
雙眼因為喊完嘅關係而變得紅腫，  
面頰上慢慢淡出兩圈紅暈，  
男生亦都伸出雙手，  
伸向被推倒的女生，  
膝蓋紅腫嘅女生，  
亦都將佢嘅雙手伸向男生，  
名為友誼嘅契約就由當日男生嘅行為簽定了。

\*\*\*

\*\*\*

由嗰一日起，  
我同阿翊本來嘅二人組就變成加埋呢個女仔嘅三人組。  
每日小學放學之後就會連同阿翊一同奔向屋苑嘅遊樂場，  
睇吓有冇呢個女仔嘅蹤影，  
而通常一個禮拜五日，  
呢個女仔有三日都會喺度，  
每次呢個女仔一見到我哋，  
又或者我哋見到個女仔，  
大家都會默契地不約而同咁樣走向繩網陣，  
每一次我哋嘅固定活動就係鬥快爬上去塔尖。  
而當然，

天翊永遠都係第一。  
我同個女仔冇一次贏到佢。  
而當我哋全部人上到塔尖，  
大家就會坐喺最高個層，  
抬頭仰望天上嘅白雲，  
天上嘅飛鳥，  
然後一齊講一下各人天馬行空嘅夢想。

我仲好記得細個嘅阿翊一見到飛鳥，  
就會話自己將來嘅夢想，  
就係可以喺天上面飛，  
好似佢咁自由自在，無拘無束，  
而家呢個夢想應該冇乜可能實現到了。  
小時候嘅我哋行每一步都要跟住地下瓷磚嘅紋路，  
總係喜歡吵吵鬧鬧，  
好小嘅一件事就可以嘈一餐，  
但係唔使5分鐘就和好如初。  
可能呢一種就係只屬於小時候嘅天真爛漫，  
對待每個人都附上真心，  
全心全意咁樣去交流。

當大概過咗半年之後，  
我附上左我嘅真心，  
全心全意咁樣同呢個女仔做朋友，  
但係有一日佢就無聲無息咁樣消失咗係我哋嘅生活，  
當日我同阿翊放學如常地到遊樂場「放電」，  
但係嗰個女仔當日冇嚟到，  
我哋都不以為意，  
但係日復日地過，  
一個星期都冇見到呢個女仔，  
心裏面不期然感到低落，  
突然之間一個人從你嘅生活裏面消失，  
呢種感覺真係好難受。  
而三人組正式地變返從一開始嘅兩人組，  
亦都慢慢習慣呢個女仔嘅離去，  
心裏面對佢嘅印象，  
就好似一張充滿墨水嘅白紙放入水裏面，  
慢慢化開，  
直到最後就連張白紙都變得溶溶爛爛。  
亦都冇諗過呢一個女仔，  
多年後重新踏入我嘅生活。  
而當年破爛嘅白紙，  
而家慢慢喺我腦裏面拼接返嚟。

\*\*\*

「呢個就係細個同我哋一齊玩嗰個女仔...？」  
我好驚訝地呆望住個女仔而細細聲咁向我母親大人提問。

「係呀，使唔使咁驚訝...俾返啲禮貌，縮番埋個下巴啦！」  
佢亦都毫不客氣咁回答。  
我會咁驚訝嘅原因係因為我印象中嘅佢細細個係一個肥妹仔，  
但係女大十八變，  
而家已經成為一個美少女，  
仲要係女神級...

「好耐冇見啦...辰軒。」  
而家嘅佢微微地垂低頭，  
面上泛紅，  
就如同當年嗰個女孩子。  
「好...耐冇見啦...話說其實當年都未知你叫咩名...？」  
「我叫做鍾情~可以叫我Kay。」

## 第七章——「樂天女孩」

第七章——「樂天女孩」

「你呢幾年經歷過啲咩...？」

我合唔上下巴咁樣問Kay。

「由六年班升中學嗰個暑假就發憤減肥...始終唔想再經歷多次以前嘅事呢～」

佢眼神突然暗淡落嚟，

本來嗰一雙炯炯有神嘅眼睛消失咗，

但係過咗唔夠3秒，

佢就變返嗰個滿面笑容嘅女孩子。

「你用咗一個暑假就將自己變成咁...」

我一臉不可思議咁望住佢，

始終呢件事實在太過匪夷所思。

「我都明白好難相信，但係呢個係事實～」

佢用佢雙眼睛凝視着我，

了解佢以前嘅經歷再見到佢既眼神，

呢個女孩子仍然惹人憐愛，

而且佢嘅雙眼有種感覺令人想去了解佢嘅故事，

去保護佢令到佢唔再受到傷害。

「你仲記唔記得阿翊～」

「梗係記得～細個三人組最後一個就係佢。」

「不如搵日我哋三個一齊約出去玩吓？」

「我方問題㗎。我而家搬返去同我婆婆以前個單位一齊住，即係你樓上～」

「咁我哋交換聯絡方式先～」

經過我哋一輪嘅敘舊之後，

母親大人就問Kay晚餐想食咩，

此時此刻先至知道，

原來佢喺我哋屋企出現嘅原因，

就係母親大人搵佢落嚟食飯...

咁喺呢個時候我就把握時間去形容下Kay，

細個嘅佢係一個面圓圓眼大大，

短頭髮嘅肥妹仔，

而小學升中學嗰個暑假經歷完一場「大變革」之後，

依家呢一刻嘅佢依舊係眼大大鼻高高，

而且害羞嘅性格一啲都冇變到，

身高長高到167cm，

而身材方面就...不予置評...

所以我認為上天係公平㗎！

但係Kay只有身材呢方面比較遜色，

其餘方面都可以堪稱接近完美。

然而喺呢一場晚餐亦都有再發生任何特別嘅事情，

只係單純嘅敘舊，

而送佢哋離開嘅時候，  
Kay喺我耳邊細細聲同我講一句  
「你同天翊，聽日5:00老地方不見不散。」  
隨後佢就同佢婆婆返屋企。  
而老土嘅八點檔劇情，亦都喺呢一個時刻拉下帷幕。  
\* \* \*

而今日我嘅大腦終於上線，  
雖然琴晚做功課嘅時候仍然寫錯自己係中四，  
但總比唔記得要返學好！  
亦都因為咁，  
今日出門口嘅過程係冇遇上阿翊，  
而咁樣即係代表我唔會遲到，  
呼~放心晒~

今日嘅我放慢腳步咁樣一邊享受音樂，  
一邊望住城市嘅繁榮，  
但城市嘅繁榮亦都代表着市民嘅壓力同埋勞力，  
唉...  
一諗到讀咁多書，  
就你為咗將來出嚟過住日復日嘅生活就感到好唔甘心，  
但係身為一塊可有可無嘅齒輪，  
呢個社會又點會有你發聲嘅空間，  
我哋嘅工作就係乖乖地做一個推動社會經濟嘅奴隸，  
又或者做一隻蜜蜂去為蜂后採花蜜。  
喺我一邊思考人生之際，  
車到左，  
而我亦拋開一堆千年不解之謎，  
專心聽歌，  
專心留意風景。

轉眼間就已經去到終點站，  
換言之就係時候落車，  
踏入「監獄」之後，  
第一樣嘢見到嘅就係狼群，  
而且獅子王嘅直屬部下，  
狼王——亦即係Mètis。  
「同學早晨。」  
「早晨。」  
今日佢比平時嘅佢更加靚，  
髮型同平時唔一樣，  
而且仔細啲睇仲會見到化咗少少妝，  
我哋學校化妝係犯校規嘅但係始終佢係狼王，  
都冇人可以奈佢何，  
可能因為放學約咗人吧，

返到課室之後，

就迅速返埋自己個位，

「辰軒早晨！」

「早晨阿柔。」

晨咁早就已經返到嚟學校嘅阿柔，

仍然元氣滿滿朝氣勃勃咁樣同每一個返到課室嘅人打招呼。

還真是陽光樂天呢。

而阿翊亦都不出所料喺打鐘嘅時候趕入課室，

今日嘅佢比平時嘅佢亦都有啲唔同，

精心裝扮，

可能母親大人同咗家姐講今日放學去見Kay...？

所以佢知道咗就打扮下自己...？

等陣小息問吓先。

## 第八章——「意外現場」

第八章——「意外現場」

「翊，家姐係咪同咗你講左我哋今日放學約咗人？」

「吓...約左邊個？」

即係母親大人冇同家姐講啦。

咁佢今日做咩要刻意打扮...？

算啦，而家呢個唔係重點。

「記唔記得細個有個女仔成日同我哋喺公園玩？」

「有少少印象。」

「琴日佢無啦啦出現咗係我屋企，所以約咗佢今日放學喺個公園等。」

「軒爺，你肯定自己有俾人呢？」

「呃...我諗冇啱...」

喺呢個時候，

代表小息完結嘅鐘聲亦都響起，

而迎接呢個時刻嘅係中文，

「地獄」呢一個字已經唔足以形容呢一個科目同埋呢一堂，

「起立！敬禮！」

「姜sir早晨！」

「同學早晨！」

而此時此刻阿柔望住我，

我突然驚覺今日係阿柔「正式」第一日返學，

畢竟佢就好似一個插班生一樣，

一分鐘過後佢仍然注視着我，

「做咩望住我？」我忍唔住問佢。

呢一刻嘅佢就好似一個小朋友「眼仔碌碌」咁樣望住自己陌生嘅世界，

然而繼續注視着我並說道，

「辰軒，你可唔可以幫我一個忙～」

多疑嘅性格呢一刻再次出現，

但望住佢天真無邪嘅雙眼，

感覺唔到任何惡意，

所以我就放軟心腸，

「幫咩？」

「等陣lunch同我去行下學校～」

「...好吧。」

「Fan QQQ～」

\*\*\*

中文連堂完結，

落堂嘅鐘聲帶來短短45分鐘嘅午息，

去放鬆一整天疲累嘅身軀，

突然有人篤左我背脊一下，

我轉身，



發現原來係阿柔，  
呢一刻既佢伸出舌頭，  
做起鬼臉，  
然而嘆一口大氣，  
就好似將一整日累積落嚟既疲累一次過呼出去，  
「好劫？」我忍唔住問到，  
「你唔劫咩？」  
估唔到佢會反問返我，  
嗯...  
冇預計過嘅答案...

「還好吧。」好劫...劫到一個點...  
阿柔突然行近一步望住我，  
並且露出一個似是而非嘅笑容，  
冇問題吧...  
「行啦～辰軒～」  
「嗯。」

喺行去禮堂嘅途中，  
突然發現點解佢唔搵其他朋友？  
「點解唔搵你其他朋友？」  
「個個都要陪男朋友～冇人肯陪我～」  
「咁你唔搵自己男朋友？」  
「佢都唔係呢間學校～」  
「噢...」  
睇來學校班男仔冇望了。

然而過咗唔夠5分鐘，  
我就發現周遭都傳來一啲注視目光，  
仔細一看，  
所有人都注意到呢個女孩子嘅出現，  
其實都正常嘅，  
畢竟一個美少女突然出現咗喺學校引起迴響都唔出奇。

同阿柔喺學校慢慢行，  
一路遊覽學校唔同嘅地方，  
而且亦都同佢講吓學校以前一啲趣聞，  
例如有一對情侶一齊入咗殘廁但係冇出過嚟，  
各種學校唔同嘅事件，  
但係突然之間有個師兄出咗嚟，  
但同時間佢後面亦都有好多女仔跟住佢，  
佢俾咗一封信阿柔，  
然後不發一語走咗，  
而嗰位師兄身後嘅女性亦都仇視住阿柔。

當人潮散去，  
我同阿柔亦都繼續上路，

「你知道佢係邊個？」

「中六師兄—『符日燦Sky』，學校其中一大風頭蠶，『十星』之一。」

「咩係十星？」

「每年中一到六嘅女性都會有一個秘密活動，就係投選學校十大校草。」

「原來如此...」

「我哋班嗰個黃天翊都係其中一個。」

然而阿柔睇我面前慢慢打開封信，

原來係嗰位師兄嘅電話號碼，

嗯...老套。

時間過咗冇幾耐，

午息亦都完結，

而我同阿柔返到課室嘅時候，

亦響起一片嘩然，

估唔到Sky交出一封信嘅消息，

咁快已經傳遍校園。

我哋返去座位嘅途中有少部份嘅女性生物仇視住阿柔，

大概是認為他們的男神被搶走吧，

而阿柔嘅朋友亦都蜂擁咁樣圍住佢嘅座位，

睇嚟大家對呢件事都好有興趣，

我就慢慢坐喺佢身旁食花生吧。

## 第九章——「隱形遊樂場」

第九章——「隱形遊樂場」

「點解頭先Sky會同你講嘢嘅？」

「原來你識佢㗎？」

「可唔可以介紹俾我呀！」

阿柔措手不及咁樣望住身邊包圍着佢嘅朋友同同學，

完全答唔到任何問題，

佢無助咁樣望向我，

我亦聳一聳膊頭，

表示「我都有任何辦法」，

而係呢一刻，

救世主出現了，

「全部同學返埋位！而家開始上堂！今日課程好趕，唔使起立。」

此時此刻，

阿柔喺我身邊嘆了一口大氣，

感覺就好似經歷完一場大劫難一樣。

「辰軒，我係係咪惹左個大禍...？」

「少少吧，始終真係好多人都鍾意Sky。」

「唉...」

阿柔垂低頭嘆一口大氣。

而我望一望課室周圍，

仍然有不小嘅目光望住阿柔，

看來頭先嘅餘溫都仲未散去，

我都不禁輕輕搖頭，

算啦，

而家都係專心上堂。

\*\*\*

每日重複與疲勞嘅一日，

就以悅耳嘅鐘聲作結，

我亦都好迅速將我嘅行裝整理好，

將書包放上書枱，

再走向阿翊。

「喂，走得未？」

佢一臉詫異咁望住我，

「吓，走去邊度？」

「咩啊？咪話約咗細個個女仔。」

佢呆望住我，

然而一念茫然咁回答我，

「我有同你講我去咩？」

...

好似真係冇...

而呢一刻就變成我呆望佢，

1分鐘過去，  
佢就回答道，  
「sorry bro，今日真係唔得...」  
我亦都無謂強求，  
畢竟係我冇提早同佢講，  
「唔緊要啦，下次一齊約佢敘舊。」

而我決定自己一個踏上呢一趟旅程，  
隨即返到自己嘅書枱擺返書包，  
「辰軒聽日見啦～」  
「聽日見。」  
然後健步如飛地行出課室，  
老實說，  
其實對於呢個敘舊嘅活動幾期待，  
畢竟呢一個曾經珍視嘅朋友一夜之間消失，  
相隔多年又突然出現返，  
感覺佢令我心中多年沉靜嘅湖泊泛起漣漪。

去到校門，  
我一邊檢查手機累積一整日嘅訊息，  
一邊行緊學校門口最著名嘅「長命斜」，  
正當我經過學校一條暗巷，  
發現Metis一邊望住手機，  
一邊留意周圍嘅環境，  
就好似等緊人一樣，  
我亦都不以為意，  
繼續踏上我嘅征途。

雖然好似我之前所講，  
佢間學校就喺我學校附近，  
不過為咗延續細個嘅傳統，  
我哋大家都一致認為唔好約埋一齊去，  
決定去到再憑緣份相遇。

\*\*\*

「我返到嚟啦！」  
我風馳電掣咁跑入房，  
將個書包調入枱底，  
再迅速咁換走件校服，  
着上運動服裝，  
當我收拾行裝嘅同時，  
無意中望到書枱上面嘅相架，  
啊...真懷念...  
估唔到呢一個三人組合仲有機會重現。

突然房門傳來「叩叩叩」，  
我上前去開門，

「做咩事。」

「仔，你係咪約咗情情？」

「係呀。」

「咁快啲出去啦，唔好耍人等！我當佢係半個女㗎！」

完全唔知佢咁個日係我唔知情嘅情況底下傾咗啲咩，

佢咁兩個關係進步神速，

瞬間就當左人咁係半個女...

「得啦，我有困住啲時間。」

「叫佢得閒上多啲嚟食飯～」

...

然後佢就出房了。

而我就繼續收拾我嘅行裝，

過咗7分鐘左右，

抬頭望一望個鐘，

差唔多夠鐘了，

我就合上雙眼，

一路深呼吸，

調整自己嘅心情，

呼...

冇問題...

出發...

掛上笑臉，

「我出去喇！」

「小心啲吖！」

「知道～」

懷舊嘅道路，

留意附近嘅人事物，

發現真係完全唔同晒，

以前路旁嘅麵包店消失咗，

就連公園裏面嘅「氹氹轉」都比某啲機構清拆左，

你內心嘅遊樂場仲存在嗎？

一轉眼就嚟到呢個公園，

承載住我大部份童年回憶嘅公園，

慶幸嘅係細過我哋三個成日玩嘅繩網陣...

各樣遊樂設施都健在。

突然聽到身後傳來一陣腳步聲，

聞到專屬於「佢」嘅味道，

「嚟咗啦～」

「點解得你嘅～」

「佢今日唔得閒，下次早啲約佢一齊出嚟～」

「好！」

「佢」行到嚟我身邊，

「係熟悉嘅感覺呢～」

「我都係咁話。」

## 第十章——「返老還童」

第十章——「返老還童」

「你仲記唔記得呢個鞦韆！」  
Kay好興奮咁樣一齊喺公園行嚟行去，  
係呢一日，  
我同佢暫時拋開左高中生一個軀殼，  
徹底忘記下年公開試帶來嘅折磨，  
徹底拋開所有壓力，  
徹徹底底咁樣變返一個小朋友。

「啊...真係好懷念啊~」  
「大家都變咗好多，但係又好似唔係變咗好多，好複雜呵呵。」  
Kay凝視着我嘅雙眼，  
我望咗佢一眼，然後就將視線移向上天，  
估唔到玩咗一陣就黃昏，  
然而我再將視線移向我哋小時候成日玩嘅繩網陣。

「鬥快爬上去？」  
「等你講好耐，為咗呢樣嘢我今日仲特登着返條褲~哈哈。」  
我哋兩個不言不語咁樣行到去其中一個角落，  
「你仲記得遊戲規則呀嘛~」  
「從來都有忘記過。」  
「咁我開始倒數啦！3！2！」

當我講完2個一瞬間突然聽到一把男聲大嗌，  
「等等！等等！等埋我！」  
嗰把聲音大到嚇親我哋兩個，  
而答案你哋都知道，  
「翊，你今日唔係唔得閒咩？」  
「天都黑啦，咩都搞掂晒！」  
阿翊反一反白眼然後回答到。

但係此時佢身後，仲有一個人，  
係Metis，換言之即係佢今日約咗嘅人係Metis啦~  
Metis向我哋打完招呼亦都講咗一句去提醒阿翊，  
「Mika姐等緊我哋返去㗎...」  
「得啦~你俾5分鐘我就可以搞掂佢哋兩個！」

而Kay亦不屑地回答，  
「睇吓你係咪真係可以打贏我哋~」  
「去玩就企好啦。」  
而我亦都再次開始倒數，  
「3！2！1！Go！」  
一開始係天翊領先，  
但係我同Kay亦都唔執輸，

慢慢從頭居上但過程並不順利，  
直到去到一個位，  
我同Kay終於追到阿翊並排。

亦都嚟到我哋由細到大都會卡關嘅地方，  
但係時候Kay喺我哋面前輕輕鬆鬆咁樣跳左上去...  
我同翊呆左咁樣望住佢，  
好勁...

呢個位置係由細個嘅時候，我哋都要用好長時間先上到去，  
但唔知點解佢不加思索就跳咗上去，  
而我同翊用咗接近45秒先至成功破解，  
然而跳咗上去。  
但係喺我哋破解嘅時候Kay已經好成功咁樣登頂，  
並以王者姿態咁樣俯瞰我哋。

阿翊問Kay，  
「你練咗好耐？」  
「都唔係呀，好簡單啫～」  
我同翊都好無言地望住佢，  
「阿翊！多多指教，我係鐘情Kay！」  
「多多指教！好似細個咁叫我阿翊或者天翊！」

但係呢個時候Metis大嗌咗一句，  
「夠鐘啦！黃天翊快啲跳落嚟！」  
而翊亦都唔敢要佢等，  
所以就快咁講咗句，  
「如果你聽日OK嘅話夜晚喺軒爺屋企見，Bye！」

而Kay亦都點一點頭，  
翊就一下跳咗落去，  
然後同Metis向佢屋企方向離開，  
我就繼續同Kay坐喺度塔尖，  
好似細個咁樣望住個「鹹蛋黃」同埋天空嘅飛鳥，  
真係寫意，  
「其實我冇諗過會遇返你。」  
「我今次返嚟嘅目的都係為咗搵返你哋兩個～」  
「咁其實點解你一開頭會走嘅？」  
「之後再講啦～而家肚餓！返去你屋企食嘢啊～」  
「哦，咁你同你屋企人講聲先～」  
「Okay！」

\*\*\*

「我哋返嚟啦！」  
母親大人即刻好熱情咁行出嚟，  
「情情快啲入嚟啦，坐吓先好快有得食！」  
佢徹徹底底咁樣無視咗我嘅存在...

「姨姨唔使咁客氣啦！」

「唔好嘅！我當你係半個女㗎喇！」

然後喺Kay耳邊輕聲講咗句，

但係太細聲我聽唔清楚，

然而Kay「紅都面晒」咁樣呆咗望住母親大人，

而母親大人亦都繼續入去煮飯。

我用對手喺Kay眼前掃兩掃，

佢個靈魂先至返嚟，

「我阿媽頭先同你講咩？聽到你呆晒。」

「冇嘢冇嘢冇嘢！佢冇講嘢！快啲入去坐低啦，哈...哈哈..」

佢就好似一個機械人過熱一樣，

奇奇怪怪...



## 第十一章——「令人期待的下集預告」

第十一章——「令人期待的下集預告」

「方辰軒！過嚟開枱！」

「收到...」

當我同Kay喺客廳做緊功課、溫緊習嘅時候，  
母親大人就喺樓下廚房叫我落去幫手準備晚餐，

「咁你喺度做多陣，等陣再叫你。」

「Okay!!!」

而我就落咗樓下幫佢手。

期間母親大人又繼續發表佢奇怪嘅發言，

「你覺得阿Kay點啊？」

「可以點呀...」

「都幾靚咩～」

我點一點頭表示同意佢嘅發言，

畢竟以現代嘅審美觀嚟講，

佢絕對係一個美人。

「你估有冇得發展下～你唔好再咁毒啦～」

「邊有阿媽中五鼓勵個仔拍拖...」

「拍下拖有咩所謂啫～」

「我專注學業...」

「真係冇你符...」

而我眼尾亦都見到Kay喺樓梯偷聽緊，

但係聽到我講專注學業就上返去樓上。

「鐘情！食得嘢啦！」

當我哋準備好晚飯嘅時候我就叫佢落嚟，

而佢亦都用咗不足1分鐘，就落到嚟。

我覺得佢呢一點幾好，

佢由細到大都唔會要人哋等，唔會遲到。

「食飯！」三人同時發言。

與此同時，母親大人再次做起佢嘅「雞仔媒人」，

「Kay你記得得閒多啲上嚟食飯！唔使客氣！」

而Kay亦都禮貌地點點頭回應。

當晚亦再有特別嘢發生，好簡單地食完晚飯Kay就返咗屋企，

而當我完功課後亦都上床休息，

為聽日返學作充足休息...

「啊...」

我望一望鬧鐘顯示住「7:04」，

伸咗伸懶腰，拎起電話再慣常咁揸入社交媒體，

發現一則青少年墮樓案...

唉...

錯喺個制度。

喺張床度坐左5分鐘左右就決定落床，  
梳洗一番再着上校服，  
檢查書包一下有冇遺留任何嘢，  
確定冇之後就落去食早餐。

「早晨母親大人。爸爸。」  
「早晨！」佢哋兩個精神滿滿咁回答我，  
看來佢哋心情不錯。  
用咗10分鐘完成早餐就即刻出門口，  
畢竟有少少趕。

出門口嘅時候，見到有兩個人影喺電梯門口，  
行緊少少就發現原來係阿翊同Metis，  
我慢慢梳理我嘅思緒，  
琴日夜晚見到佢哋兩個，  
今日朝早都見到佢哋兩個，  
咁咪即係代表佢哋兩個成晚都一齊？

喺我梳理思緒期間，  
阿翊同我打招呼，  
「軒爺！早晨！」  
Metis亦都向我點點頭。  
「早晨，兩位！」  
由於我同Metis完全唔熟悉嘅關係所以非常尷尬，  
當我出咗就即刻用我要買早餐嘅理由離開佢哋兩個。  
呼...  
真係好尷尬...

但係當我行第二條路嘅時候就見到另外一位學校風頭躉，  
「辰軒！早晨！」  
阿柔小跑過嚟。  
已經講咗好多次早晨嘅我亦都感到疲累。  
「早。」  
「你食咗早餐未啊？」  
「食咗。」  
「點解你睇落好似好唔精神？」  
「都唔知點解今日一大朝早就見到咁多人...」  
阿柔見到我嘅心情唔太好，就冇再出聲。  
我同佢慢慢向着學校嘅方向行，  
大家都不發一語，但係反而呢種感覺更加舒服，更加自在。  
去到便利店門口，  
阿柔就揮一揮手，  
「你等我一陣！」

佢就入咗便利店，而我就喺門口等佢，  
過咗5分鐘左右佢就行返出嚟，  
「嘩！呢個俾你！」

佢伸出手，遞左一杯咖啡俾我。

我呆呆地望住佢。

直到佢推一推我，

我嘅魂魄先至返嚟。

「多謝...」

「飲完今日就精精神神啦～行快啲啦！」

講完之後，我同佢亦都加快腳步返學校。

估唔到今日嘅事，竟然會影響到之後同Kay既發展。

# 更新

作者近日狀態不佳  
寫嘢嘅心態同我嘅初心唔同  
所以呢個故事會停一停更新  
會keep住寫，不過唔會公開住  
如果大家想留意吓近幫嘅話可以去我ig  
@yinch409  
多謝大家嘅支持  
待繼續